

# Ikaduwa

## Sulat I

# Pedro

### Una Basan

Ni libro igsulat i Pedro tun ta mga ágpamaké ki Jesu-Cristo na ikatalap na góddô tun ta lima mga banuwa tun ta probinsya ka Asia. Tô timpo tô, marapung é mga taratinurù na ágtinurù katô ánnà bánnal. Purisu ni gó é igsulat din tun ta mga ágpampamaké ébô dì dan mánnal katô ánnà bánnal ágtinuruán.

Marapung tô mga igtinurù i Pedro tun ta mga ágpampamaké ukit kani sulat. Igkagiyán dan na dì dan dumuma katô mga ánnà bánnal taratinurù su tô áglumun dan igtikud tun ta madat kakalyag katô lawa dan, asta kakalyag dan na miring tô mga manubù kandan (2 Pedro 2:1-22). Igkagi din pagsik na kailangan lumili dan katô mga manubù na dì ágbánnal na lumónód si Jesus nit banuwa (2 Pedro 3:4). Igpapanámdám din sikandan na bánnal gó lumónód si Jesus nit banuwa, asta sikandin tô mangulu. Igtinurù din pagsik kandan na marapung pa tô mga dumunggù nit banuwa ka masig dán tô sippangan.

**1** <sup>1</sup>Sakán si Simon Pedro na ágsuguánnán asta apostoles i Jesu-Cristo. Igsulatta tun ákniyu na igpamaké na magunawa áknami na igpamaké kandin. Ni kapamaké ta igbággé áknita ukit ki Jesu-Cristo na Manama ta asta Taratábbus na igimu áknita na nángngà tun ta saruwan ka Manama.

<sup>2</sup>Mólà pa ka ágkadugangan tô kédu asta tô kasunayan ka Manama tun ákniyu tákkás katô kasóddór yu katô Manama asta ki Jesus na Áglangngagán ta.

### Katawar asta kasalin katô Manama

<sup>3</sup>Na, igbággé ka Manama áknita tô langun na ágkailanganán ta ébô manté ki asta tumuman ki katô kakalyag din. Tô gó tô igbággé din ukit katô katulusan din asta ukit katô kasóddór ta kandin. Igtawar sikandin

áknita ébô tanggapán ta tô séllaán ka bantug din asta tô kadigárran din. <sup>4</sup>Tingód kani kadigárran din, igtandóan ki ikandin na bággén din áknita tô tuu madigár asta tô tuu dakál pulusán, ébô ukit kani mga igtandô din, makalili kó katô mga kakalyag na makadadat nit banuwa, asta mému tô ágkémun yu iring katô ágkémun din. <sup>5</sup>Purisu ággár-ággárrí yu dugangi tô kapamaké yu katô kadigárran, asta tun ta kadigárran dugang yu tô kagpáttan, <sup>6</sup>asta tun ta kagpáttan dugang yu tô kapasunnad, asta tun ta kapasunnad dugang yu tô katiis katô kahirapan, asta tun ta katiis dugang yu tô madigár ágkémun tun ta saruwan ka Manama, <sup>7</sup>asta tun ta madigár ágkémun dugang yu tô kaginawa katô mga kataladi yu, asta ánnà dád tô mga kataladi yu tô ginawaan yu asal tô langun manubù. <sup>8</sup>Atin ka duwán iring kani tun ákníyu asta kadugangan pa ni, pasóddórán yu na ággamítán kó katô Manama asta duwán ágpulusán din ákníyu ukit katô kasóddór yu katô Áglangngagán ta na si Jesu-Cristo. <sup>9</sup>Atin ka duwán ágpamaké na ánnà iring kani tô ágkémun din, iring na bólóg sikandin ó ánnà matayyó tô kasállág din, su ilingawan din na igurasan dán ka Manama tô mga salà din.

<sup>10</sup>Purisu mga kataladi, ággár-ággár kó ébô kasóddórán na igtawar asta igsalin kó gó katô Manama. Atin ka lumun yu ni, di kó sumódô ágpamaké, <sup>11</sup>asta tuu madigár tô kahu yu tun ta ándà dán ágtamanán pagpangulu katô Áglangngagán ta asta Taratábbus na si Jesu-Cristo.

<sup>12</sup>Purisu agad isóddórán yud ni langun, asta inagpáttan yud tô kabánnalan na igtanggap yu, asal inalayunna ágpapanámdám ákníyu tingód kani. <sup>13</sup>Na, igpanámdámma na madigár ka pabákkárrán ku sikíyu ukit katô kapasampát ku ákníyu tingód katô igtinurù ku ákníyu róggun mantéya pa. <sup>14</sup>Isóddórán ku na masiggad maté,<sup>a</sup> su igpasóddór ni kanak katô Áglangngagán ta na si Jesu-Cristo. <sup>15</sup>Purisu lumun ku sippang ka malumu ku ébô inalayun yu kapanámdámman ni mga katinurù ku agad matéyad.

### Igkita dé si Jesu-Cristo

<sup>16</sup>Na, igulit ké ákníyu na matulus tô Áglangngagán ta na si Jesu-Cristo, asta lumónód gó sikandin. Tô igulit dé ánnà igimu-imu mga gulitán, asal sikami tô igkita katô séllaán ka katulusan din. <sup>17</sup>Tô igpabantug tô Ámmà Manama kandin asta tô igdurung din sikandin, idinág tô kagi ka matulus Manama tikud tun ta langit, na mà din, “Ni gó ni Batà ku na ágginawaan ku, asta tuuwa idayawan kandin.”<sup>b</sup> <sup>18</sup>Tô igduma ké kandin dangingan tun ta pabungan katô Manama<sup>c</sup>, sikami gó tô ikadinág katô kagi tikud tun ta langit.

<sup>a</sup> 1:14 Masiggad maté, ó masiggad tumanan kani lawa ku. <sup>b</sup> 1:17 Ahaán tô Mateo 17:1-5; Marcos 9:2-13; Lucas 9:28-36 <sup>c</sup> 1:18 Pabungan katô Manama, ó ugis pabungan.

<sup>19</sup>Purisu ukit katô igkita dé, idugangan tô kasarig dé katô kagi ka mga propeta ka Manama sayyan. Kailangan panámdámmán yu tô igsulat dan, su tô igsulat dan iring katô sulú na ágpappawà katô kangittángngan sippang ka lumónód puman si Jesu-Cristo na miló tun ta pusung yu.<sup>d</sup>

<sup>20</sup>Na, una ka langun, sampát yu ni. Ándà palang igsulat katô mga propeta ka Manama sayyan na igtikud tun ta kandan dád kénagpát, <sup>21</sup>su ándà palang igsulat katô mga propeta ukit dád katô kakalyag dan, asal tô mga propeta igpakagi katô Ugis Espiritu, asta igkagi dan tô mga kagi na tikud tun ta Manama.

### Ánnà bánnal mga taratinurù

**2** <sup>1</sup>Asal sayyan duwán mga ánnà bánnal propeta, asta iring kanan áknganni, su duwán pagsik mga ánnà bánnal taratinurù na madun tun ákniyu. Tuminurù dan katô ánnà bánnal ágtinuruán na makadadat katô kapamaké yu, asta méllé dan katô Áglangngagán na igtábbus kandan. Purisu tigkô dád supakan sikandan. <sup>2</sup>Marapung tô mákkás katô mga áglumun dan na makayayyà. Purisu ukit katô áglumun dan, mabuyas tô tullid kapókit ka kabánnalan. <sup>3</sup>Tingód katô katagaw dan mimu-imu dan katô mga bulaló ébô makasalapì dan. Sayyan igruudan dan ka Manama, asta dungguan dan gó ka supak.

<sup>4</sup>Ándà kéduwi ka Manama tô mga panaligan din na ikasalà, asal igantug din sikandan tun ta kangittángngan,<sup>e</sup> asta igpriso dan sippang ka dumunggù tô álló ka karuud. <sup>5</sup>Ándà kéduwi katô Manama tô mga manubù sayyan nit banuwa na ándà bánnal kandin. Agad igulit-ulitan dan i Noe na kailangan nángngà tô lumun dan, asal igipánnas dan katô Manama ukit katô lunup. Isamà dád si Noe asta tô pittu mga manubù na igduma kandin.<sup>f</sup> <sup>6</sup>Igsupakan ka Manama tô langun tun ta lunsud ka Sodoma asta Gomora ukit ka kagóbbó. Inému ni na panunggiringan katô inókitan katô mga di ágbánnal katô Manama. <sup>7</sup>Asal igpaluwà din si Lot tikud tun ta Sodoma, su matalláng sikandin asta ágkaranu tingód katô madat mga áglumun katô mga manubù. <sup>8</sup>Su tô igóddô si Lot duma kandan, igkita asta igdinág din tô madat mga áglumun dan álló-álló, asta tuu ágkaranu sikandin.<sup>g</sup> <sup>9</sup>Purisu ukit kani, ikasóddór ki na tô Áglangngagán katig ágpaluwà tikud tun ta mga pagkinnam katô mga manubù na ágpamaké kandin, asta katig sikandin sumupak katô madat mga manubù tun ta álló ka karuud. <sup>10</sup>Tuu dán gó madat tô dungguán

<sup>d</sup> 1:19 Sippang ka lumónód puman si Jesu-Cristo na miló tun ta pusung yu, ó sippang ka suméllà tun ta pusung yu tô álló asta tô karani na ágkitanán ka sállám.

<sup>e</sup> 2:4 Kangittángngan, ó Tartarus. Igbánnal tô mga Griego na ni Tartarus é mangittáng lugar tun ta siráb katô linó ka apuy para prisowan katô mga espiritu na madat é áglumun sippang ka ruudan dan. <sup>f</sup> 2:5 Ahaán tô Genesis 6:5–8:22 <sup>g</sup> 2:6-8 Ahaán tô Genesis 19:1-29

katô mga ágkapid katô madat kakalyag ka lawa dan asta ágbuyas katô langun ágpangulu kandan.

Ni mga ánnà bánnal taratinurù, magani dan na ágpallayat-layat asta ándà máddang dan ágbuyas-buyas katô ágrespetowan mga panaligan na igppapid ka Manama ébô mangulu.<sup>h</sup> <sup>11</sup> Tô mga panaligan ka Manama, agad tuu dan matulus asta mallayat pa ka tandingán katô mga ánnà bánnal taratinurù, asal di dan makému na muyas-buyas katô mga ágpangulun tun ta saruwan katô Áglangngagán. <sup>12</sup> Asal ni mga taratinurù iring katô mga mannanap tun ta kabánnássan na ándà panámdám asta ágtákkás dád katô kakalyag ka lawa dan. Inanté ébô ámmáttán dád asta giyón. Na, ni mga taratinurù, ágbuyas-buyasán dan tô mga lumu na ándà dan kagpátti. Purisu supakan dan katô Manama iring katô mga mannanap ka kabánnássan na ágmatayan dád. <sup>13</sup> Sulian dan tingód katô madat ilmu dan. Tô dayó dan tô áglumu ka madat kakalyag ka lawa dan agad álló áglumun dan. Iring dan katô dità tun ta umpak su tuu makayayyà ka dumuma dan ákniyu dalám katô kapalimudé yu, su ágpanayun dan áglumu ka madat. <sup>14</sup> Ágdantulán dan tô áglibug, su di dan ágkanángngaan katô mga salà na áglumun dan. Ágpahun dan tô mga ágkapid tun ta tagán dan. Supakan dan katô Manama su tô pusung dan ipánnuan katô katagaw! <sup>15</sup> Itadin dan su igtananan dan tô dalan ka kabánnalan. Iring dan katô propeta sayyan na si Balaam na batà i Bosor, su ágginawa sikandin ka salapi na ágbággén kandin ukit katô kalumu din ka madat.<sup>i</sup> <sup>16</sup> Asal igsapadan tô madat lumu i Balaam ukit katô asno na igsakayan din na igkagi iring na manubù asta igsapad katô kangulággan lumu katô propeta.

<sup>17</sup> Ni mga manubù ni ándà ágpulusán iring katô sánnáp na itittian, asta iring katô mga sagulapun na ágkapid ka karamag. Tapé igtaganà ka Manama tô lugar na tuu mangittáng para kandan, <sup>18</sup> su ágpadadurung dan ukit katô kagi dan na ándà ágpulusán. Ukit katô madat mga kakalyag ka lawa ágpiddán dan tô mga manubù na mantu pa igtanan katô mga áglumu ka madat. <sup>19</sup> Ágtandô dan na mému lumun tô agad ándin na kakalyag dan, asal sikandan gó tô inallang katô kadattan, su agad ándin tô pakapid katô manubù, tô gó tô ikallang kandin. <sup>20</sup> Na, tô mga manubù na ikaluwà dán tikud tun ta madat ilmu dan nit banuwa ukit katô kasóddór dan katô Áglangngagán ta asta Taratábbus na si Jesu-Cristo, atin ka lumónód dan tun ta tapé madat kantayan dan, mému dan puman állang katô salà na áglumun dan. Purisu tô katamanan dan tuu pa madat ka tandingán katô tagnà. <sup>21</sup> Atin ka ándà dan ikasóddór katô kapókit ka katanggap ka Manama katô manubù na nángngà tun ta saruwan din, madigár pa ka tandingán katô kasóddór dan, asta katanan

<sup>h</sup> 2:10 Ahaán tô Judas 8    <sup>i</sup> 2:15 Ahaán tô Numeros 22:1-38

dan katô nángngà katinurù katô Manama kandan. <sup>22</sup>Ituman dan tô bánnal panunggiringan, “Tô asu ágkan puman katô kandin inutà,”<sup>j</sup> asta “Tô babuy na igpadigusan áglónód puman áglubug tun ta libutà.”

### Matuman lumónód tó Áglangngagán

**3** <sup>1</sup>Sikiyu na ágginawaan ku, ni gó tó ikaduwa sulat ku ákniyu. Ni ta duwa sulat ku, igpasampát ku ákniyu ébô papabákkárré kó katô madigár mga panámdám na isóddóran yu. <sup>2</sup>Kakalyag ku na makasampát kó katô igulit katô mga propeta na igbánnal ka Manama sayyan, asta katô igsugù katô Áglangngagán na Taratábbus ukit katô mga apostoles yu. <sup>3</sup>Una katô langun, kailangan kagpáttan yu na tun ta katapuriyan mga álló, dumunggù tó mga manubù na yumamá-yamá katô kabánnalan, asta mapid dan katô kakalyag ka kandan lawa, <sup>4</sup>su kumagi dan, na mà dan, “Igtandô si Jesus na lumónód sikandin. Asal ánda dán sikandin? Su tikud tun ta inaté tó mga kamónaan ta, ándawù kapalinan kani banuwa su magunawa tikud tun ta kému kani!” <sup>5</sup>Tó gó tó kagin dan, su di dan malyag na sumampát katô igimu ka Manama sayyan. Ukit katô kagi din, duwán langit asta banuwa na igimu tikud tun ta wayig asta inému ukit katô wayig. <sup>6</sup>Ukit katô kagi din, igpalunupan din ni banuwa asta idattan.<sup>k</sup> <sup>7</sup>Asta ukit katô kagi ka Manama, tó langit asta ni banuwa na ágkitanán ta áknganni igtaganá din na góbbón ka dumunggù tó álló na ruudan asta supakan tó mga manubù na ándà bánnal kandin.

<sup>8</sup>Asal sikiyu na ágginawaan ku, yakó yu ágkalingawi na tun ta Áglangngagán, tó kadugéyan katô sábbad álló iring na sábbad mararan (1,000) ámmé, asta tó kadugéyan katô sábbad mararan (1,000) ámmé iring na sábbad dád álló. <sup>9</sup>Dì ágbaring-baring tó Áglangngagán na ágtuman katô tandô din, iring katô ágpanámdámmán katô mga manubù. Asal mallayat é ginawa din ákniyu, su di malyag na mandà tó mga manubù, asal kakalyag din na rumákkád tó langun.

<sup>10</sup>Asal sékót dumunggù tó álló na lumónód tó Áglangngagán, iring na kadunggù ka takón. Tó álló tó, mandà tó langit tákkás katô mabákkár dagunután, asta kadattan ka apuy tó mga bahin kani. Magóbbó ni tibuk banuwa tákkás katô langun-langun kannun. <sup>11</sup>Na, su iring kani dadattan ka Manama ni langun, kailangan nángngà tó áglumun yu tun ta saruwan ka Manama <sup>12</sup>róggun na tuu kó gangat asta ágtaganà para katô kalónód katô Áglangngagán tun ta álló na igsalin ka Manama, su magóbbó asta mandà tó langit, asta matunó tó mga bahin tingód katô kénit! <sup>13</sup>Asal ukit katô igtandô ka Manama, gangatan ta tó mantu langit asta tó mantu banuwa na óddóan katô mga manubù na igtanggap ka Manama na nángngà tun ta saruwan din.<sup>l</sup>

<sup>j</sup> 2:22 Panultihon 26:11    <sup>k</sup> 3:5-6 Ahaán tó Genesis 1:6-8; 7:11.    <sup>l</sup> 3:13 Ahaán tó Isaias 65:17; 66:22

<sup>14</sup>Purisu sikiyu na ággínawaan ku, róggun na gangat kó katô katumanan kani, ággár-ággár kó ébô tuu kó malinis asta di kó mabuyas tun ta saruwan ka Manama, asta duwán kasunayan yu. <sup>15</sup>Panámdám yu ni. Mallayat é ginawa katô Áglangngagán ta ébô matábbus tô mga manubù. Magunawa pagsik tô igsulat katô áknita ággínawaan kataladi na si Pablo, su duwán igpasóddór katô Manama kandin. <sup>16</sup>Tun ta langun sulat din, magunawa tô kagi din tingód katô álló ka Manama, agad duwán gó mga mahirap ginagpáttán tun ta mga sulat din. Purisu tô mga manubù na ándà tuu ikasóddór asta sékót ágkapid, ágpalinán dan tô kóbadan katô igsulat din iring katô kapalin dan katô duma mga kagi ka Manama na igsulat. Asal dungguan dan ka kadattan.

#### **Katapuriyan mga panalan**

<sup>17</sup>Purisu sikiyu na ággínawaan ku, su taganá kó ikasóddór kani, banté kó ébô di kó mapid katô mga bulaló ka mga di ágbánnal katô Manama, su di mému ka ágduwa-duwa kó tingód katô igpamaké yu áknganni. <sup>18</sup>Asal panayun yu tanggapi tô kédu asta tô kagpáttan tikud tun ta Áglangngagán ta asta Taratábbus na si Jesu-Cristo. Mólà pa ka durungán asta pabantugán sikandin áknganni asta sippang ka ándà ágtamanán! Matuman ni.